

MPP UMP terima watakah pelantikan

MAJLIS Penyerahan Watakah dan Angkat Sumpah Majlis Perwakilan Pelajar (MPP) Universiti Malaysia Pahang (UMP) sesi 2017/2018 yang berlangsung di Dewan Senat Bangunan Canseleri Tun Abdul Razak Pekan menyaksikan seramai 27 orang perwakilan mengangkat sumpah taat dan setia menjalankan tanggungjawab mewakili lebih 11,000 pelajar UMP di kedua-dua kampus UMP di Pekan dan Gambang.

Acara penyerahan watakah dan angkat sumpah diketuai Yang Dipertua Majlis Perwakilan Pelajar sesi 2017/2018 iaitu pelajar Tahun 3 Fakulti Sistem Komputer dan Kejuruteraan Perisian (FSKKP), Muhammad Amrun Aniq Mohamed Saidi diikuti perwakilan lain di hadapan Naib Canselor UMP, Profesor Dato Dr Daing Nasir Ibrahim, berkata, keupayaan MPP untuk menzahirkan kepimpinan berimpak melalui kualiti kerja, profesionalisme, kematangan berfikir dan kerjasama baik daripada warga mahasiswa dan warga kerja membuktikan kewibawaan mereka.

"Kabinet MPP sesi 2017/2018 ini menyaksikan kombinasi muka lama dan baharu bagi menunaikan amanah kepimpinan yang dipilih oleh warga mahasiswa. Kombinasi ini sebagai satu kelebihan dan kekuatan yang membolehkan pendekatan dan dasar MPP terus dapat disetarakan dengan aspirasi strategik UMP.



Muhammad Amrun Aniq menandatangani watakah pelantikan disaksikan Daing Nasir .

"Saya mengharapkan satu lagi dimensi utama yang perlu mendasari kepimpinan MPP kali ini ialah keupayaan untuk menjuarai ekspresi suara dan inisiatif berkaitan isu-isu sejagat terutamanya yang berkaitan dengan kemanusiaan, keamanan dan alam sekitar," katanya.

Beliau berkata demikian pada Majlis Penyerahan Watakah dan Angkat Sumpah Majlis Perwakilan Pelajar (MPP) Universiti Malaysia Pahang (UMP) sesi 2017/2018.

Hadir sama, Timbalan Naib Canselor (Hal Ehwal Pelajar dan Alumni), Profesor Datuk Dr Yuserrie Zainuddin, Penolong Naib Canselor (Hal-Ehwal Korporat dan Kualiti), Prof Datuk Dr Ishak Ismail, Pendaftar Abd Hamid Majid dan Penasihat Undang-undang, Datin Wan Maizurina Wan Othman.